

『日本三代實錄』5 貞觀三年六月十六日己未条

十六日己未。始頒行長慶宣明曆經。先是。陰陽頭從五位下兼行曆士大春日朝臣眞野麻呂奏言。謹檢。豐御食炊屋姫天皇十年十月。百濟國僧觀勒始貢曆術。而未行於世。高天原廣野姫天皇四年十二月。有勅始用元嘉曆。次用儀鳳曆。高野姫天皇天平寶字七年八月。停儀鳳曆。用開元大衍曆。厥後。寶龜十一年。遣唐使錄事故從五位下行內藥正羽栗臣翼貢寶應五紀曆經云。大唐今停大衍曆。唯用此經。天應元年。有勅令據彼經造曆日。無人習學。不得傳業。猶用大衍曆經。已及百年。眞野麻呂。去齊衡三年。申請用彼五紀曆。朝廷議云。國家據大衍曆經。造曆日尚矣。去聖已遠。義貴兩存。宜暫相兼不得偏用。貞觀元年。渤海國大使烏孝慎新貢長慶宣明曆經云。是大唐新用經也。眞野麻呂試加覆勘。理當固然。仍以彼新曆。比校大衍五紀等兩經。且察天文。且參時候。兩經之術。漸以龜疎。令朔節氣既有差。又勘大唐開成四年。大中十二年等曆。不復与彼新曆相違。曆議曰。陰陽之運。隨動而差。差而不已。遂与曆錯者。方今大唐開元以來。三改曆術。本朝天平以降。猶用一經。靜言事理。實不可然。請停舊用新。欽若天步。詔從之。